

2014 Rhif 2071 (Cy. 206)

ADDYSG, CYMRU

**Rheoliadau Ffioedd Myfyrwyr
(Symiau) (Cymru) (Diwygio) 2014**

NODYN ESBONIADOL

(Nid yw'r nodyn hwn yn rhan o'r Rheoliadau)

Mae Rheoliadau Ffioedd Myfyrwyr (Symiau) (Cymru) 2011 ("y Prif Reoliadau") yn rhagnodi'r symiau sylfaenol a'r symiau uwch y caiff sefydliadau perthnasol godi tâl amdanynt drwy ffioedd dysgu ar gyfer cyrsiau gradd llawnamser cymhwysol yn unol ag adran 28 o Ddeddf Addysg Uwch 2004 ("y Ddeddf"), sef amodau at ddibenion adran 27 o'r Ddeddf.

Mae'r Rheoliadau hyn yn diwygio'r Prif Reoliadau.

Mae rheoliad 3 yn gwneud mân ddiwygiad i reoliad 3 o'r Prif Reoliadau. Mae'r diwygiad yn darparu bod y symiau sylfaenol a'r symiau uwch a ragnodir gan reoliad 3 yn ddarostyngedig i reoliadau 4-6.

Mae rheoliad 4 yn disodli rheoliad 4 o'r Prif Reoliadau. Mae rheoliad 4 yn rhagnodi'r symiau sylfaenol a'r symiau uwch mewn cysylltiad â blwyddyn academaidd derfynol cwrs pan fo'n ofynnol i'r flwyddyn academaidd honno fel rheol gael ei chwblhau ar ôl llai na 15 wythnos o bresenoldeb ac mewn cysylltiad â blwyddyn academaidd cwrs ar gyfer hyfforddiant cychwynnol athrawon pryd y mae cyfanswm unrhyw gyfnodau o astudio llawnamser yn llai na 10 wythnos.

Mae rheoliad 5 yn mewnosod dau reoliad newydd (5 a 6) sy'n rhagnodi'r symiau sylfaenol a'r symiau uwch ar gyfer cyrsiau rhyngosod ac ar gyfer astudio a lleoliadau gwaith tramor.

Ystyriwyd Cod Ymarfer Gweinidogion Cymru ar gynnal Aseidiadau Effaith Rheoleiddiol mewn perthynas â'r Rheoliadau hyn. O ganlyniad, lluniwyd asesiad effaith rheoleiddiol o'r costau a'r manteision sy'n debygol o ddeillio o gydymffurfio â'r Rheoliadau hyn. Gellir cael copi oddi wrth: Yr Is-adran Addysg Uwch, Llywodraeth Cymru, Parc Cathays, Caerdydd CF10 3NQ.

2014 Rhif 2071 (Cy. 206)

ADDYSG, CYMRU

Rheoliadau Ffioedd Myfyrwyr (Symiau) (Cymru) (Diwygio) 2014

Gwnaed 23 Gorffennaf 2014

*Gosodwyd gerbron Cynulliad Cenedlaethol
Cymru* 4 Awst 2014

Yn dod i rym 31 Awst 2014

Mae Gweinidogion Cymru, drwy arfer y pwerau a roddwyd i Gynulliad Cenedlaethol Cymru gan adrannau 28(6) a 47(5) o Ddeddf Addysg Uwch 2004(1), ac sydd bellach yn arferadwy ganddynt hwy(2) yn gwneud y Rheoliadau a ganlyn:

Enwi, cychwyn a chymhwyso

1.—(1) Enw'r Rheoliadau hyn yw Rheoliadau Ffioedd Myfyrwyr (Symiau) (Cymru) (Diwygio) 2014.

(2) Daw'r Rheoliadau hyn i rym ar 31 Awst 2014 ac maent yn gymwys o ran Cymru.

Diwygio Rheoliadau Ffioedd Myfyrwyr (Symiau) (Cymru) 2011

2. Mae Rheoliadau Ffioedd Myfyrwyr (Symiau) (Cymru) 2011(3) wedi eu diwygio yn unol â'r rheoliadau a ganlyn.

3. Yn rheoliad 3 yn lle "Yn ddarostyngedig i reoliad 4" rhodder "Yn ddarostyngedig i reoliadau 4-6".

4. Yn lle rheoliad 4 rhodder—

(1) 2004 p. 8. Mae diwygiadau i adran 28 nad ydynt yn berthnasol at ddibenion y Rheoliadau hyn.
(2) Trosglwyddwyd swyddogaethau Cynulliad Cenedlaethol Cymru i Weinidogion Cymru yn rhinwedd adran 162 o Ddeddf Llywodraeth Cymru 2006 a pharagraff 30 o Atodlen 11 iddi (p. 32).
(3) O.S. 2011/885 (Cy. 129).

“Symiau sylfaenol a symiau uwch rhagnodedig ar gyfer blynyddoedd academaidd terfynol penodol cyrsiau a blynyddoedd academaidd penodol cyrsiau ar gyfer hyfforddiant cychwynnol athrawon

4. At ddiben adran 28 o Ddeddf 2004 y swm sylfaenol yw £2,000 a'r swm uwch yw £4,500 mewn cysylltiad â:

- (a) blwyddyn academaidd derfynol cwrs pan fo'n ofynnol i'r flwyddyn academaidd honno fel rheol gael ei chwblhau ar ôl llai na 15 wythnos o bresenoldeb;
- (b) cwrs ar gyfer hyfforddiant cychwynnol athrawon⁽¹⁾ (gan gynnwys cwrs o'r fath sy'n arwain at radd gyntaf), blwyddyn academaidd pryd y mae cyfanswm unrhyw gyfnodau o astudio llawnamser yn llai na 10 wythnos.”

5. Ar ôl rheoliad 4 mewnosoder—

“Symiau sylfaenol a symiau uwch rhagnodedig ar gyfer cyrsiau rhyngosod

5. At ddiben adran 28 o Ddeddf 2004 y swm sylfaenol yw £800 a'r swm uwch yw £1,800 mewn cysylltiad â blwyddyn academaidd cwrs rhyngosod—

- (a) pryd y mae cyfanswm unrhyw gyfnodau o astudio llawnamser yn llai na 10 wythnos; neu
- (b) mewn cysylltiad â'r flwyddyn academaidd honno ac unrhyw flynyddoedd academaidd blaenorol ar y cwrs, os yw cyfanswm unrhyw un neu ragor o gyfnodau o bresenoldeb nad ydynt yn gyfnodau o astudio llawnamser yn y sefydliad (gan ddiystyru gwyliau yn y cyfamser) yn fwy na 30 wythnos.

Symiau sylfaenol a symiau uwch rhagnodedig ar gyfer astudio a lleoliadau gwaith tramor

6. At ddiben adran 28 o Ddeddf 2004 y swm sylfaenol yw £600 a'r swm uwch yw £1,350 mewn cysylltiad â blwyddyn academaidd cwrs a ddarperir ar y cyd â sefydliad tramor—

- (a) pryd y mae cyfanswm unrhyw gyfnodau o astudio llawnamser yn y

(1) ‘Hyfforddiant cychwynnol athrawon’ yw hyfforddiant neu addysg â'r nod o baratoi personau, nad ydynt yn athrawon, i fod yn athrawon.

sefydliad yn y Deyrnas Unedig yn llai na 10 wythnos; neu

- (b) mewn cysylltiad â'r flwyddyn academiaidd honno ac unrhyw flynyddoedd academiaidd blaenorol ar y cwrs, os yw cyfanswm unrhyw un neu ragor o gyfnodau o bresenoldeb nad ydynt yn gyfnodau o astudio llawnamser yn y sefydliad yn y Deyrnas Unedig (gan ddiystyru gwyliau yn y cyfamser) yn fwy na 30 wythnos."

Huw Lewis

Y Gweinidog Addysg a Sgiliau, un o Weinidogion
Cymru

23 Gorffennaf 2014